

*Te Kura Kaupapa
Māori O
Ngā Mokopuna*

*Toku reo, toku ohohō
Toku reo, toku mapihi
maurea
Toku reo, toku whakakāi
marifi*

He Puna Kōrero

Wahanga 1 Wiki 2

Pānui 1 - Rāmere 12 o Huitānguru 2021



Kātahi te pai o te paepae o te ope nui i kawē mai ai ngā tamariki hou ki te kura.

Tēnā tātou e te whānau i tēnei tau hou o te kura

Kua mutu ngā wiki e rua, ā kua whakapau werawera ngā tamariki me ngā kaiako. Heoi e harikoa ana te ngākau i ngā āhutatanga i te tīmatanga o tēnei tau hou o te kura!

I tīmata te tau nei i te Raapa, te rā tuatahi o Huitānguru. Tīmata ai te Pure i te 5.30 o te awatea. Kātahi te mīharo o te mahi nā! Nui atu i te 50 tangata i tae mai ki te whakarongo ki te karanga a whaea Ana, te takutaku a Papa Tū me te karakia o Matua PJ. Ahakoa te makariri i waho, i te tatahi hoki, kua rongō i te mauri aio e rere haere ana. He reka hoki te parakuihi i whakaritea e ngā ringawera hoki.

I tīmata te pohiri ki ngā tamariki hou rātou ko ō rātou whānau me o rātou kohanga reo. Ko ngā kākano o Te Kohanga Reo o Ngā Mokopuna ko Terina Anderson rātou ko Waïora Alo-Reeder, ko Tahu Potiki Grant. Ko te purapura mai i Te Kāhui Kohanga Reo, mihi atu mihi mai ki a Rocky Winkels. Tēnei ano te mihi ki a Mairangi Tapiata nō te kohanga Reo o Ngaio. Kua hoki mai a Ree-Anne Ryder, te mokopuna a Papa Eugene. Nau mai, haere mai koutou ki raro i te maru o Te Aho Matua ki te Whanganui a Tara.

.. kia wātea, kia māma te ngākau, te tinana, te wairua i te ara takatū...



Waïora



Tahu Pōtiki



Rocky



Mairangi



Terina



Ree-Anne

Ngā Wāhanga Kura 2021

Wāhanga 1: 3/2/21-16/4/21 Wāhanga 2: 3/5/21-9/7/21 Wāhanga 3: 26/7/21-1/10/21 Wāhanga 4: 18/10/21-14/12/21

Rā o te Wiki	Rā Timata	Wā Timata	Rā mutu	Wā Mutu	Te Mahi	He Whakamārama
Rāhina	15/02/2021	1.00 p.m.		3pm	Rā Kauhoe mō te Kura katoa	I a Rāmere mō te wahanga tau nei. Ka hoki ngā tamari-ki ki te kainga mai i te puna kauhoe.
Rātū	16/02/2021	3pm	Mo te wiki katoa		Uiui Matua	Mātua mā, korero ki tā tō tamaiti kaiako. Māna tōna ake rātaka e whakarite.
Rātū	16/02/2021	5pm			Hui ā-whanau Wharekura	
Rāpare	18/02/2021				Ohu Kaihautū	
Rāhina	22/02/2021	1pm		3pm	Rā Kauhoe mō te Kura katoa	I a Rāmere mō te wahanga tau nei. (Ahakoa kāore i raro nei)
Rāapa	24/02/2021	6pm			Hui ā-whānau	
Rāmere	26/02/2021				RĀ KAIAKO — Wananga Reo 1	E whitu ngā wānanga reo mo ngā kaiako i tēnei tau.
Rātapu	28/02/2021		Mo te wiki katoa		2021 Huinga Reo	Mo nga tauira Tau 12-13 anake. Kei Otautahi
Rāhina	1/03/2021	1pm		3pm	Rā Kauhoe mō te Kura katoa	I a Rāmere mō te wahanga tau nei.
Rāpare	18/03/2021		21/3/2021		RĀ KAIAKO—Hui ā Tau o Ngā Kura Kaupapa Māori Te Aho Matua	Kei Taranaki i tēnei tau. Kei te haere ngā kaiako me ētehi whanau ki tenei hui.
Rāpare	25/03/2021				Ohu Kaihautū	
Rāapa	31/03/2021	6pm			Hui ā-whānau	
Rāpare	1/4/2021				Te Rā Kohanga Reo	
Rāmere	2/4/2021		6/4/21		Aranga	Kia mataara, mātua mā. Ka kati te kura i te Rātū hoki.
Rāmere	9/4/2021				Manu Kōrero a-kura	Wharekura—Reo Māori
Raapa	14/4/2021				Manu Kōrero a-kura	Wharekura—Reo Pākeha
Rāpare	15/4/2021				Mana Kuratahi	Haere mai mātua mā!!
Rāmere	16/4/2021				Te Rā Kaumātua	Rā whakamutunga

Nō te paetukutuku o te kura tēnei maramataka.

Ka whakahoutia te maramataka i ngā wā katoa. Tēnā koa tirohia ki te

<http://www.tkkmmokopuna.school.nz/kokonga-whanau/maramataka/>

Kākahu kura wāhanga tuatahi.

Kura Tuatahi - tarau poto kura , hū pārairai pango, tī hāte kura, pōraka, vest kura.

Wharekura - tarau poto, pango hoki, hū pārairai pango, hāte mā, pōraka, vest rānei

Wharekura Kākahu Ōkawa - Atu i ngā mahi hākinakina, ki te puta ngā akonga Wharekura i te kura, ka mau rātou i ō rātou kākahu ōkawa.

Kaua e wareware te **pōtae mō te raumati**, kei mahue te tamaiti i te māhau, tākaro ai.



Te Rā Whakanui i te Tiriti o Waitangi

Rū ana te whenua (me te atāmira) i te haruru o ngā tamariki o Ngā Mokopuna i te rā whakanui i te kaupapa o te rā, arā te hainatanga i te Tiriti o Waitangi. Maringi mai ana ngā mihi o ngā whanau e matakitaki ana i ngā pipi paopao e menemene ana, e mihi atu ana i mua i te aroaro o te marea.

Ia te tau, ia te tau, ko mātou te kapa haka tuatahi o te rangi. Ki tā te tumuaki Matua Rawiri, ko te kura kaupapa Māori tētahi o ngā mokopuna o te Tiriti o Waitangi. Mei kore ko tērā, ka kore koe e kite i ngā kura kaupapa Māori. E ai ki tā Ree-Anne Ryder, tamaiti hou o te akomanga Kōpuapua Tuakana, he pai rawa atu te rangi., “He tino pai te rā o Waitangi i te mea i kite tōku whānau i ahau i runga i te atāmira e haka ana”.

Kōrero Kē Atu

Te Ira Tangata — He waiata

He waiata tawhito tēnei o te kura. Na Koka Keri Pewhairangi i tito. Ko ia tētahi whaea o te kura, tētahi kaiako o te kura me tētahi tumuaki o te kura.

I ako mātou i tēnei waiata i te Wānanga mo Te Aho Matua tuatahi i tū i te Rāhina kua hori.

Te Ira Tangata

Nō ngā rangitūhaha te wairua o te tangata i tōna whakairatangata ka tau tōna wairua ki tōna tinana ka tipu tōna tuakiri katoa i roto i te ahuru mōwai whanau noa...

Te ira tangata...

Mauri, Mana, Ihi, Tapu, Wehi, Iho Mātua, Whatumanawa, ngakau, hinengaro, Auaha, Waihanga, Pūmanawa e Te tuakiri o te tangata

Ko te ngākau te mata
Me te kuaha ki te Wairua
Ko te whiu o te kupu ko te wero
Ko te riri, te aroha, te hūmarie

Ko ēnei āhua katoa
He mea kuhu ki te ngākau
Titi tonu ki te wairua...

He tapu te tangata ahakoa ko wai,
He tapu tō te wāhine
He tapu anō tō te tāne
Mā te mahi ngātahi e tupu ora ai
Ngā tamariki me te iwi e...

Kia pākeke rā te tangata
Māna anō e whakataua
Te huarahi hei oranga mōnā
Ahakoa iti, ahakoa nui
Kei a ia ōna tikanga
Āuē, he mokopuna koe
Nā Ranginui, nō Papatūānuku
Waiwai ana ngā karu
Te tirohanga atu
Ahakoa he iti
He iti pounamu
Ahakoa he iti

Te ira tangata

Rongomamau /Whātōtō

Tēnā koutou e te whānau o Ngā Mokopuna! Kua tae mai te wā, ka hoki mai a matua Hohepa rāua tahi ko matua Willie Walker ki te whakaako i ō tātou mokopuna i te rongomamau (grappling aka Jiu Jitsu).

Kore rawa tēnei kori tinana te whawhai anake! Kai te ako tō tamati maha rawa ngā rautaki i hāngai ki ngā huarahi o ngā matapono. Hei tauira: te manaaki ki te tangata, aroha ki te tangata, kia pare ai te kino, kia whai whakaaro, kia whakapakari tinana, kia poipoia ngā tuakiri o te tangata, kia hapaitia te wairua, me te ngakau, me te hinengaro.

Waihoki, ka tuhono ai tēnei kori tinana ki te kaupapa matua o te tau nei, ara, ko te Kaitiakitanga.

Mena kai te hihahia koe, tō tamati rānei ki te haere mai, tēnā, nau mai!

Ia Rāpare—3.30-5pm. Kāore he utu. Mau kakahu kori tinana / rongomamau.

Nāku iti nei - Nā Matua Hohepa

Mana Kura Tahī

Kua timata ngā whakaharatau mō te kapa nei. Matua mā, me tae mai tō tamaiti kia ako ngā kupu, ngā mahi kapa haka. Kotiro mā, mēnā he poi āu ki te kainga, haria mai. Te katoa – haria mai te patara wai mōu.

Tuhia i tō maramataka. Hei te 15 o Poutūterangi te whakataetae ā-rohe.



Ngā Wāhanga Kura 2021

[Wāhanga 1: 3/2/21-16/4/21](#) [Wāhanga 2: 3/5/21-9/7/21](#) [Wāhanga 3: 26/7/21-1/10/21](#) [Wāhanga 4: 18/10/21-14/12/21](#)